

Jentera BN Sarawak Bersiap Sedia Hadapi PRU-13
Bernama
10 April, 2013

KUCHING, 10 April (Bernama) -- Jentera pilihan raya Barisan Nasional (BN) Sarawak sudah bersiap sedia untuk menghadapi pilihan raya umum ke-13 (PRU13), kata setiausaha agungnya Datuk Dr Stephen Rundi Utom.

Beliau berkata sebenarnya BN Sarawak telah meletakkan jentera pilihan rayanya dalam keadaan bersiap siaga jauh lebih awal sebelum Suruhanjaya Pilihan Raya (SPR) membuat pengumuman Rabu tentang hari penamaan calon pada 20 April dan hari pengundian pada 5 Mei.

"Kami akur dengan keputusan SPR dan tidak kisah sama ada tempoh berkempen ditetapkan selama 12 atau 14 hari, kami sudah bersedia untuk menghadapi sebarang kemungkinan serta untuk menggempur pembangkang," katanya apabila dihubungi Bernama di sini hari ini.

Rundi berkata oleh itu pihaknya berharap semua pihak yang terlibat dengan pilihan raya umum kali ini di semua peringkat akan mematuhi garis panduan serta undang-undang yang dikuatkuasakan SPR bagi memastikan proses pilihan raya berjalan lancar.

Di Sarawak, PRU13 akan hanya menyaksikan pertandingan bagi kerusi parlimen berikutan pilihan raya negeri yang diadakan pada 2011.

Sebelum pembubaran parlimen pada 3 April, BN menyandang 29 daripada 31 kerusi parlimen di Sarawak.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=940939>